

antecedentem ea propositione negari, censores existimant?

55. Utrum damnatione propositionis 31. damnati censendi sint D. Augustinus, & D. Thomas, qui omnia Christi Domini desideria, plena tamen, firma, & absoluta, suisque ad Deum precibus expressa, suum semper effectum sortiri, disertissime docent?

Annon potius ea damnata sit propositio, de quibusvis accepta desiderii, antecedenti etiam voluntate, meraque, ut ajunt, velleitate conceptis?

56. Utrum damnatione propositionis 32. proscriptæ censendæ sint synonymæ prorsus D. Augustini sententiæ, de Christi morte efficaciter, atque ex absoluta salutis procurandæ voluntate appetita, pronuntiata?

Annon potius ea damnata sit propositio, quod de Christi Domini morte quomodolibet, ac etiam mere sufficienter tolerata, fuerit a Censoribus intellecta?

57. Utrum damnatione propositionis 33. negatum sit speciale Pauli cæterorumque Apostolorum privilegium, mortis scilicet Christi pro illis specialiori efficaciori que modo appetita; unde illis nata sit eminentior firmiorque in Christi morte fiducia?

Annon potius ea damnata sit propositio, quod fiduciam in Christi morte, eorum duntaxat fideliū propriam dicere videatur, qui bonis terrenis, ac sibi metipsis renunciarunt.

Ad quæ sita illa si respondere lubet iis, penes quos est ferendi iudicii summa potestas, bona Catholicis Scholis dabitur pace frui, turbæ occasione Clementinæ Constitutionis excitæ, momento silescant, nullaque deinceps movebuntur; fallaciæ atque præstigiæ, quibus hæcenus Pontificio illo iudicio intemperanter abusi sunt aliqui, depellantur, aliæ ne adhibeantur in posterum cavebuntur; quodque cæteris præstat, stabit in tuto veritas religio fides, omniaque hostium tela devitabit.

Nec quemquam movere debet, quod sint Quæ sita illa numero multa, ad quæ singulatim respondere longum fuerit. Non est ita profecto, non est ita. Sic enim a nobis proposita sunt, duasque in partes distincta singula, ut quæ videtur neganda pars, loco semper primo sit posita, quæ affirmanda, secundo. Quare unico generali responso, eoque paucis verbis expresso, resolvi omnia possunt; si in nostram illi sententiam descenderint. *Ad primam cujusque quæ sita partem respondetur negative, ad secundam affirmative.*

Muta sunt Labia dolosa, quæ loquuntur adversus justum iniquitatem, in Superbia & in abusione.
Psal. 30. vers. 21.

F I N I S.

COLLOQUIUM
PATAVINUM
INTER
PUBLIUM ET NÆVIUM
Adversus Theologiam Supplicem
PATRIS MAG. SERRY.